



Utoqqaat Illuat  
Rasmuuseqqap Aqqutaa 3  
3900 Nuuk

7. april 2021

All. nr./brevnr.:  
2020-900-0003-25  
Sull./sagsbeh.: HB/jh

## **Nuummi Utoqqaat Illuanni misissuineq**

### **1. Aallaqqaasiut**

Nuummi Utoqqaat Illuanni misissuineq siumut ilimasaarutigineqareersimasoq Inatsisartut Ombudsmandiannit misissuiartortunit 12. aamma 13. august 2020-mi ingerlanneqarpoq. Misissuineq taanna Ombudsmandip ataatsimut sulineranut ilaatillugu ingerlanneqarpoq, taamaalillunilu naammagittaalliuummik aalajangersimasumik tunngaveqarani misissuinerulluni.

Nalunaarusiamut ilanngussaq misissuinerup inatsisitigut tunngavigisaa pillugu paasissutissanik imalik innersuussutigaa.

Misissuiartortut tassaapput ombudsmand Vera Leth, immikkut siunnersorti Henrik Bach, fuldmægtig Benjamin Turner aamma oqalutsit/nutserisut pisortaat Jørgen Hansen Ombudsmandeqarfimmeersut.

Kommuneqarfik Sermersuumi Isumaginninnermik Suliffeqarnermillu Ingerlatsivimmi Utoqqarnut Suliassaqarfimmi pisortaq Arnannguaq Heilmann Christensen misissuinerup ilaani najuuppoq.

Misissuinermi eqqartorneqartut ilaannaat nalunaarusiami matumani ilanngunneqarput.

Utoqqaat Illuat aamma Kommuneqarfik Sermersooq nalunaarusiamut matumunnga missingiut pillugu oqaaseqaatiminnik saqqummiussinissaminnut

periarfissinneqarsimapput. Utoqqaat Illuata aamma Kommuneqarfik Sermersuup oqaaseqaataat e-mailikkut 12. februar 2021-meersukkut tiguakka. Oqaaseqaatit taakku nalunaarusiami matumani ilanngunneqarput.

## **2. Misissuinerup piareersarneqarnera ingerlanneqarneralu**

Utoqqaat Illuat misissuiartussamaarnermik allakkatigut 26. maj 2020-meersutigut ilisimatinneqarpoq, misissuinerlu pillugu paasissutissat amerlanerusut aamma tigullugit. Utoqqaat Illuat tamatumunnga atatillugu qinnuigaara sulusut, najugaqartut ilaqutaasullu tamaasa misissuissamaarnermik misissuiartortunillu oqaloqateqarnissamut periarfissaqarnerannik ilisimateqqullugit.

Kommuneqarfik Sermersuumi ingerlatsivik misissuiartussamaarnermik e-mailikkut 26. maj 2020-meersukkut ilisimatippara. Ingerlatsiviup misissuinerup ilaani erseqqinnerusumik isumaqatigiissutigineqartumi alapernaaserti-taasutut peqataasinnaanera tamatumunnga peqatigitillugu neqeroorutigaa.

Paaqqinniffik najugaqartullu pillugit allakkatigut paasissutissat assigiinngitsut misissuineq sioqqullugu Utoqqaat Illuannit tiguakka.

Utoqqaat Illuanni pisortaqatigiit sinniisaat, tassalu pisortap tullia, misissuiartortunit misissuinermi oqaloqatigineqarpoq.

Taakkua saniatigut Utoqqaat Illuanni immikkoortorta qarfiit pisortaat, sulusut tallimat najugaqartorlu ataaseq misissuiartortunit oqaloqatigineqarput.

Utoqqaat Illuata initai misissuiartortunit aammattaaq misissorneqarput.

## **3. Utoqqaat Illuat pillugu ataatsimut oqaatigisassat**

Utoqqaat Illuat kommunip utoqqarnik paaqqinniuffiutigaa Nuummiittoq, paaqqutarinniffittut immikkoortorta qarfinnut marlunnut, oqilisaassinermi immikkoortorta qarfimmuut kiisalu sammisassaqartitsinermi ulluuneranilu ornit-takkatut immikkoortorta qarfimmuut agguataarneqarsimasoq.

Paaqqutarinniffittut immikkoortortaarfik Tungiu najugaqartunut 19-inut inissaqarpoq.

Paaqqutarinniffittut immikkoortortaarfiup aappaa Ippat najugaqartunut 13-inut inissaqarpoq, taakkunannga inissat pingasut immikkoortortaarfimmi Paaqqutamiillutik. Taakkua saniatigut immikkoortortaarfeeqqami allami Katammi najugaqartunut tallimanut inissaqarpoq. Ippammi inissanit 13-iusunit inissat tallimat oqilisaassivigineqarlutik najugaqartunut aammattaq atornerqarput.

Oqilisaassinermi immikkoortortaarfik Pillorissaavik oqilisaassivigineqartunut qulingiluanut inissaqarpoq. Immikkoortortaarfeeqqami Ippammi oqilisaassinermi inissat tallimat ilanngukkaanni oqilisaassinermi inissat katillugit 14-iupput. Oqilisaassinermi immikkoortortaarfimmi sammisassaqtitsinermi uluuneranilu ornittakkatut immikkoortortaarfiit aamma ilaatinneqarput.

Utoqqaat Illuanni misissuinerup nalaani najugaqartutut nalunaarsorneqarsimasut katillutik 44-pput.

#### **4. Ombudsmandip pingaarnerusutigut naliliinera**

Utoqqaat Illuat najugaqartunut avatangiisinik toqqissisimanartunik neqeroruteqarfiusutut pingaarnerusutigut paasisaqarfigaara. Tamatuma saniatigut paasisara unaavoq Utoqqaat Illuanni pisortaqatigiit sulisullu suliaminnut pikorissuusut suliatillu najugaqartut ataqqillugit ingerlakkaat.

Misissuinera kiisalu sulisunik tallimanik najugaqartumillu ataatsimik oqaloqateqarnera aqqutigalugit aamma paasisara unaavoq najugaqartut Utoqqaat Illuanni najugaqarnertik nuannarigaat.

Paasisara aammattaq unaavoq paaqqutarinnittut sulisut misissuinermi oqaloqatigisama tamarmik pissaanermik atuisarnek pillugu inatsit (isumaginninnermik suliasaqarfimmi pissaanermik atuneq pillugu Inatsisartut inatsisaat nr. 1, 21. november 2013-imeersoq kingusinnerusukkut allannguuteqartinneqarsimasoq) ilisimasaqarfigalugulu paasisimagaat. Sulisut oqaatigaat

pissaanermik qaqutigorujussuaq atuisarlutik, tassami perorsaanikkut ator-tussanik suleriaatsinillu assigiinngitsunik aporaattoqartillugu atortakkamin-nik peqaramik.

Pissutsit ataasiakkaat oqaaseqaateqarnissannut pissutissaqalersippaannga. Taakku imm. 5-imit 8-mut allaaserineqarput.

## **5. Napparsimalluni sulinngitsoortarnerit sulisussaaleqinerlu**

Sulisut arlallit misissuiartortunit misissuinermi oqaloqatigineqartut oqaatigaat Utoqqaat Illuanni piffissat ilaanni napparsimaneq pissutigalugu sulinngitsoor-torpassuaqartillugu sulisussaaleqisoqartartoq.

Sulisup ataatsip napparsimaneq pissutigalugu sulinngitsoornerup annertus-susianut assersuutitut oqaatigaa pisuni aalajangersimasuni immikkoortorta-qarfiup sulisuisa affaannai takkuttartut, sulisullu takkuttut pisuni taamaat-tuni ulapinnerujussuusariaqartartut.

Sulisulli misissuisartortunit oqaloqatigineqartut napparsimaneq pissutigalugu sulinngitsoortarnerpassuit najugaqartunut qanoq sunniuttarnerat assigiin-ngitsunik isumaqarfigaat.

Sulisup ataatsip nassuiaatitut oqaatigaa najugaqartut ikiorneqarnissaat eq-qarsaatigalugu ilaanneeriarluni pingaarnersiuisoqartariaqartartoq, immik-koortorta qarfimmi sulisup ataasiinnaanera pissutigalugu. Sulisup tamatu-munnga peqatigitillugu oqaatigaa najugaqartut ilaat ikiorneqarnissaminnik nal. akunneri marluk tikillugit utaqqsariaqartartut, sulisullu najugaqartut ikioqqullutik nilliasut tusaasinnaasarai.

Sulisup allap oqaatigaa sulisut piffissani sulinngitsoortorpassuaqarfiusuni na-jugaqartunik timikkut eqqiaaneq annikinnerusumik peqqissaaruttariaqarta-raat. Sulisoq oqarpoq Utoqqaat Illuat naammattunik nangiuteqartuaannartoq.

Sulisut pingajuata oqaatigaa immikkoortorta qarfimmi sulisut suleqatimik su-linngitsoortut suliassaat ilanngullugit sularisaraat, suliassat tamarmik naam-

massineqarsinnaaqqullugit. Sulisup taassuma tamatumunnga peqatigitillugu oqaatigaa immikkoortorta qarfiit allat suliassaannik isumaginnittariaqartarneq ilungersunartuusoq, sulisussaaleqinerlu ajornartorsiutaasoq.

Najugaqartup misissuiartortunit oqaloqatigineqartup oqaatigaa sulisut sulinngitsoortarnerat ajornartorsiutaasoq. Najugaqartoq oqarpoq sulisut ikiuinisaminnut piffissaqartuaannartanngitsut, uffarnissamullu sivusuumik utaqqisariaqarsinnaasarluni.

Ingerlatsivimmeersup misissuinermi oqaatigaa napparsimaneq pissutigalugu sulinngitsoortarneq sulisullu taarseraannerat annikillisinniarlugit suliniuteqartoqartoq. Tamanna paasissutissiisarnikkut ingerlatanik suliaqarnikkut ilaatigut pissaq, sulisullu tassani pingaartitatut isigineqartut, soorlu isumasuineq, ataqqinnineq utoqqaallu pillugit politikkeqarneq, pillugit paasisaqartinneqassallutik.

Kommuneqarfik Sermersuup misissuinerup kingornatigut e-mailikkut 12. februar 2021-meersukkut ilaatigut oqaatigaa napparsimalluni sulinngitsoortarnermik ikilisaaniarneq kommunip ukiut kingulliit marlussuit ingerlaneranni sulinutigisimagaa. Najugaqartut paaqqutarineqarnerminni pitsaanngitsumik misigisaannut pissutaasunik pitsanngorsaaniarneq kommunip misissuinerup kingornatigut aallutilersimavaa.

Kommuneqarfik Sermersuup tamanna pillugu oqaatigaa anguniagaasoq tassaasoq napparsimalluni sulinngitsoortarneq ataatsimut annikinnerusoq sulinutimik erseqqissunik ilaqartinneqarluni paaqqutarineqarnermi pitsaanngitsumik misigisaqartarnermik taamaattunik pinaveersaartitsisinnaasoq.

*Paasissutissiissutigineqartut maluginiarpakka, napparsimallunilu sulinngitsoortarnermut aamma sulisunik amigaaqarnermut atatillugu annertunerusumik iliuuseqaqqissananga.*

## **6. Nakorsaatinik toqqortarinnineq**

Nakorsaasersuinermi puussat iisartakkanik imallit immikkoortorta qarfinni tamani sulisut inaanni saqqumiinnartut misissuiartortut misissuinermi takuaat. Nakorsaait puussaat taakku pisuni tamani sikaaviup nakorsaataasiviup eqqaani nerriviup qaaginaaniipput. Sulisut inaat parnaarsimangillat matuilu ammaannarlutik. Sulisut inaat torsuusani najugartut ineeraasa inissisimafiiniipput.

Immikkoortorta qarfinni pisortat misissuiartortunut oqaatigaat nakorsaait parnaarusimaneqaratik maaniinnarmiinnerat illersorneqarsinnaangitsoq nalunngikkitsik. Nakorsaait puussaat iisartakkanik imallit saqqumiinnarunnaarsillugit aaqqiissutissaq suliniutigigitsik immikkoortorta qarfinni pisortat oqaatigaat.

Utoqqaat Illuata nalunaarusiamut matumunnga missingiut pillugu oqaaseqaatai Kommuneqarfik Sermersuup misissuinerup kingornatigut e-mailikkut 12. februar 2021-meersukkut nassiuppai. Utoqqaat Illuata oqaaseqaataanit ilaatigut erserpoq nakorsaait nakkutigineqanngikkunik parnaarusimaneqar-nissaat paaqqinniffiup pisortaqatigiivisa sulisunut ingerlaavartumik ilisimatit-sissutigisaraat. Utoqqaat Illuanni nakorsaatinik toqqortarinnineq pillugu naalakkiut nutartigaq e-mailimi 12. februar 2021-meersumi ilanngullugu nassiunneqartumi ilaavoq, tassanngalu erserpoq nakorsaait immikkoortorta qarfinni tamani sikaavinni parnaarsimasuniitinneqassasut.

*Paasissutissiissutigineqartut maluginiarpakka, nakorsaatinillu toqqortarinnin-nermut atatillugu annertunerusumik iliuuseqaqqissananga.*

## **7. Paaqqutarinniffittut oqilisaassivittullu immikkoortorta qarfimmi Ippammi najugaqartunut malittarisassat assigiinngitsut**

Utoqqaat Illuanni malittarisassat pisortaqatigiit misissuiartortunut nassuiar-paat.

Quppersagaaraq paaqqutarinniffittut immikkoortorta qarfimmi najugaqartu-nut malittarisassanik imalik misissuiartortunut tunniunneqarpoq. Paaqquta-

rinniffittut immikkoortorta qarfimmi pujortarneq aalakoornartortalimmillu imigassartorneq inerteqqutaanngillat.

Quppersagaaraq oqilisaassivittut immikkortorta qarfimmi najugaqartunut malittarisassanik imalik misissuiartortunut aammattaaq tunniunneqarpoq. Oqilisaassivittut immikkoortorta qarfimmi pujortarneq aalakoornartortalimmillu imigassartorneq inerteqqutavoq.

Immikkoortorta qarfimmi Ippammi tulleriinneri malillugit paaqqutarineqartunut oqilisaassivigineqartunullu inissaqarpoq. Inissani assigiinngitsuni taakkunani najugaqartut torsuusami taannaasumi ineeraqarput, taamaattumillu najugaqartut paaqqutarinniffittut immikkortorta qarfimmi najugaqartussatut oqilisaassivimmiluunniit najugaqartussatut tiguneqarsimanerat apeqqutaatilugu pujortarneq aalakornartortalimmillu imigassartorneq pillugit malittarisassat assigiinngitsut atuullutik.

Utoqqaat Illuanni immikkoortorta qarfinni pisortat marluk oqaatigaat najugaqartut katitigaanerat aamma pujortarnermik aalakoornartortalimmillu imigassartornermik inerteqquteqarneq najugaqartut akornanni aporaannermik pilersitsisartoq. Oqilisaassivittut immikkooortorta qarfimmi najugaqartunut pujortarnermik aalakoornartortalimmillu imigassartornermik inerteqquteqarnerup tamatumalu paarlattuata paaqqutarinniffittut immikkoortorta qarfimmi najugaqartunut atuunnerisa najugartunit ajornartorsiutitut isigineqarnerat tamatumunnga pissutaavoq.

Kommuneqarfik Sermersuup misissuinerup kingornatigut e-mailikkut 12. februar 2021-meersukkut ilaatigut oqaatigaa oqilisaassivittut immikkoortorta qarfiup inissinneqarnissaa kommunip suliniutigigaa.

Kommunip taanna pillugu oqaatigaa aaqqiissut najugaqartunut sapingisamik pitsaanerpaaq atorfissaqartinneqartoq, innuttaasullu ataavartumik najugaqartussatut ilimagineqartut immikkoortorta qarfimmit immikkoortorta qarfimmut nuutsinneqattaaratik aalajangersimasumik ineqartinneqassasut.

*Paasissutissiissutigineqartut maluginiarpakka, immikkoortortaqaarfimmilu Ippammi paaqqutarineqartutut oqilisaassivigineqartutullu najugaqartunut assigiinngitsunik malittarisassaqaqtitsinermut atatillugu annertunerusumik iliuuseqaqqissananga.*

## **8. Paaqqinniffippalaartumik aaqqissuussineq**

Misissuiartortut Utoqqaat Illuata immikkoortortaqaarfii tamaasa alakkarterpaat, inillu assilisaqattaarlugit.

Nalunaarusiamut matumunnga missingiummi kaammattuutigaara immikkoortortaqaarfinni ataatsimoortarfiit pitsanngorsarneqaqqullugit, ataatsimoortarfiimmi paaqqinniffippalaartutut isikkoqarmata.

Kommuneqarfik Sermersuup misissuinerup kingornatigut e-mailikkut 12. februar 2021-meersukkut ilaatigut oqaatigaa ataatsimoortarfiit aalajangersimasut angerlarsimaffippalaannginnerat nuannersuunnginnerallu kommunip nalunngikkaa, ataatsimoortarfiilli tikinneqarsinnaanerit oqimaalutaanermi aamma aalajangiisuusimasoq, soorlu najugaqartut namminneq ingerlasinnaanerit eqqiaanerlu eqqarsaatigalugit.

Kommunip aammattaaq oqaatigaa ataatsimoortarfiit ilorrisimaarnartuunissaat nuannersumillu misigisaqarfiusinnaanissaat anguniagaasoq, tamatumunngalu peqatigitillugu tikikkuminassuseq eqqarsaatigalugu piumasaqaatinik eqqortitsisuussallutik. Isiginiagassat marluk taakku ataatsimut eqqortinjarlugit init aaqqissuunneqarnerisa allanngortinneqarnissaat kommunip suliutiga.

*Paasissutissiissutigineqartut maluginiarpakka, paaqqinniffiullu initigut aaqqissuunneqarneranut atatillugu annertunerusumik iliuuseqaqqissananga.*

## **9. Malitseqartitsineq**

Utoqqaat Illuat qinnuigaara sulisut, najugaqartut ilaqutaasullu nalunaarusiaq manna pillugu ilisimateqqullugit.



Nalunaarusiap matuma assilinera Kommuneqarfik Sermersuumi ingerlatsivimmut ilisimatitsissutitut nassiuppara.

Utoqqaat Illuanni misissuina pillugu suliaq matumuuna inaarlugu suliarineqartutut isigaara.

Nalunaarusiaq manna 2021-mi ukiumoortumik nalunaarutinni ilanngunneqarumaarpoq, nittartakkannilu [www.ombudsmandi.gl](http://www.ombudsmandi.gl)-imi tamanut saqqumiunneqarumaarluni.

### **Misissuinerup inatsiseqartitsinikkut tunngavia**

Ombudsmandip sulineranut inatsiseqartitsinikkut tunngavigisaq Inatsisartut Ombudsmandiat pillugu Inatsisartut inatsisaatigut (matuma kingornatigut Ombudsmandi pillugu inatsimmik taaneqartartussakkut) nr. 7-ikkut, 1. juni 2017-imeersukkut aalajangersarneqarpoq.

Inatsisartut Ombudsmandiat Inatsisartunit qinerneqartarpoq, tak. Ombudsmandi pillugu inatsimmi § 1, imm. 1, sulinerminili Inatsisartunut attuumasuteqarani, tak. § 6, imm. 1. Kalaallit Nunaanni Namminersorlutik Oqartussat kommunillu ataanni pisortat ingerlatsiviisa ilaat tamarmik Ombudsmandip sulinerani pineqartunut ilaatinneqarput, tak. Ombudsmandi pillugu inatsimmi § 7, imm. 1-imi oqaaseqatigiit siulliit.

Oqartussaasut inuillu Ombudsmandip sulinerani pineqartunut ilaatinneqartut inatsiseqartitsineq atuuttoq unioqqutillugu iliuuseqarnersut suliasaminniluunniit ingerlatsinerminnut atatillugu allatigut kukkussuteqarnersut sumiginnaanersulluunniit Ombudsmandip misissugassaraa, tak. Ombudsmandi pillugu inatsimmi § 19, imm. 1. Ombudsmandi isornartorsiuisinnaavoq, inassuteqaateqarsinnaalluni suliamillu paasinninnini aamma saqqummiussinnaallugu, tak. Ombudsmandi pillugu inatsimmi § 20.

Ombudsmandi pillugu inatsimmi § 16-imi oqaaseqatigiitsigut siullertigut aalajangersarneqarpoq paaqqinniffiit suliffeqarfiilluunniit kiisalu atorfeqarfiit allat Ombudsmandip sulinerani pineqartunut ilaatinneqartut suulluunniit Ombudsmandip misissorsinnaagai. Taamatut misissuinermut atatillugu – Ombudsmandi pillugu inatsimmi §§-ini 19-imi 20-milu aalajangersarneqartut saniatigut – Ombudsmandip pissutsit paaqqinniffiup aqqissuussaananeranut ingerlanneqarneranullu tunngasut kiisalu pissutsit paaqqinniffimmik atuisut pineqartarnerannut taakkulu pillugit ingerlatanut tunngasut inuppalaartumik misigittartumillu isiginnittaaseq aallaavigalugu naliliiffigisinnaavai, tak. Ombudsmandi pillugu inatsimmi § 16-imi oqaaseqatigiit aappaat.